

- भारतीय वायुसेना चेन्नई मांय 92वें वार्षिक वायुसेना दिवस माथे विशाल एयर-शो मांय वायुसैनिक खमतावां रो कर्यो प्रदर्शन ।
- प्रदेश मांय न्यारी-न्यारी ठौड़ां माथे समाज कल्याण सप्ताह रे तैत कैई कार्यक्रम राख्या जा रह्या है ।
- दौसा जिला रा लालसोट मांय डम्पर री टक्कर सूं पांच जणा री मौत- दस जणा घायल ।
- राज्य री घणखर ठौड़ां माथे दिन रे तपमान मांय बधोतरी-बुधवार ने बीकानेर, जयपुर अर भरतपुर संभाग मांय कठे-कठे बिरखा रा आसार ।

000

वायुसेना री कानी सूं आज आज चेन्नई मरीना बीच माथे एयर-शो रो राख्यी ज्यो । ओ आयोजन 92वे वार्षिक वायुसेना दिवस जळसे रे शुभारंभ रे तौर माथे कर्यो गयो है । इण शो मांय लड़ाकू विमान तेजस, मिराज, सुखोई 30 एमकेआई, जगुआर, पोसीडॉन विमान अर नुवां प्रचंड हेलीकॉप्टर साथै वायु सेना रा 72 विमान भाग ले रिया है । एयर शो ने देखण खातिर घणी तादाद मांय लोग पहुंचया । इण बरस इण शो ने लिम्का बुक ऑफ रिकॉर्ड मांय दर्ज करणे रो लगस है ।

000

रक्षा अनुसंधान अर विकास संगठन- डीआरडीओ चौथी पीढी री कम दूरी वाळी हवाई रक्षा प्रणाली री तीन परीक्षण उड़ान सफलतापूर्वक पूरी कर ली है । ओ परिक्षण राजस्थान रा पोखरण फील्ड फायरिंग रेंज मांय कर्यो गयो । आ परीक्षणां मांय घणी ऊंचाई अर गति रे साथै लकस ने भेद्यो गयो । एक वक्तव्य मांय रक्षा मंत्रालय बतायो के आं परीक्षणां मांय अस्त्र प्रणाली की मारक खमता री बार-बार पुष्टि व्ही है । रक्षा मंत्री राजनाथ सिंह सफल परीक्षण माथे डीआरडीओ, सशस्त्र बळां अर उद्योग ने बधाई दी है । वणा कह्यो की नुवी मिसाइल सूं, हवाई खतरा सूं निपटणे मांय सशस्त्र बळां ने मजबूती मिलेला ।

000

कर्नाटक रा राज्यपाल थावर चंद गहलोत कह्यो है कि वर्तमान दौर मांय मानसिक समस्यावां रो समाधान आध्यात्मिकता मांय भेळो है । वणा कह्यो कि जद आपा आध्यात्म सूं जुड़ा हा तो समस्यावां रा समाधान कानी बधा हा । श्री गहलोत लोगां सूं आध्यात्म सूं जुड़ने रो हेलो कर्यो । सिरौही जिले रा आबूरोड थापित ब्रह्माकुमारीज संस्थान मांय चाल रिया वैश्वक शिखर सम्मेलन मांय बोलता थकां वणा आ बात कही । वणा कह्यो की वर्तमान बगत मांय सामाजिक समता अर समरसता बणावण री जरूरत है । सम्मेलन मांय केंद्रीय जल शक्ति राज्यमंत्री राज भूषण चौधरी कह्यो की सनातन मांय प्रकृति पूजन री परम्परा री है अर आज रे इण दौर मांय इण प्रवृत्ति रे

खतम होणे सूं खराब नतीजा सामी आ रीया है। वणा जलवायु परिवर्तन रे संकट सूं निपटणे खातिर सामूहिक जतन री जरूरत माथे जोर दियो। वणा एक पेड़ मां के नाम अभियान रे तैत लोगां सूं बत्ती ऊं बत्ती पौधा लगाणे रो हेलो कर्यो।

केन्द्रीय कौशल विकास अर उद्यमिता मंत्री जयन्त चौधरी आज नागौर जिला रा दौरे माथे रह्या। इण रे चालता श्री चौधरी पत्रकारां सूं बणतल करता व्ह्या बतायो कि राजस्थान पीएम विश्वकर्मा योजना मांय चोखो काम कर्यो है। वणा नागौरी नस्ल रा बछड़ा रे परिवहन माथे लागी रोक ने लेर कह्यो की वे जनत करेला की नागौरी बैलां रो परिवहन राजस्थान सूं दूजा राज्या मांय आसारी सूं व्हे।

000

प्रदेश मांय न्यारी-न्यारी जगावां माथे समाज कल्याण सप्ताह रे तैत न्यारा-न्यारा कार्यक्रम राख्या जा रह्या है। इणी कड़ी मांय सवाईमाधोपुर मांय सामाजिक न्याय अर अधिकारिता महकमां री कानी सूं राख्यी ज्या समाज कल्याण सप्ताह रे तैत आज जन चेतना दिवस रे रूप मांय मनायो ग्यो। इण मौके माथे सरकारी छात्रावास अर राजकीय संप्रेषण ग्रह मांय जन चेतना रा कार्यक्रम राख्या गया। इण रे चालता पढेसरिया ने नशा मुक्ति अर शिक्षा सूं जोडने खातिर बधावो दियो गयो। पाली मांय इण सप्ताह रे तैत न्यारी-न्यारी गतिविधियां राख्यी ज्यी। राजकीय सम्प्रेषण अर किशोर गृह मांय टाबरां ने नशे सूं दूर रहणे री शपथ दिलायी ज्यी। इण मौके माथे बाल गृह मांय श्रम दान कर साफ-सफाई करी ज्यी।

000

स्वच्छता ही सेवा अभियान रे तहत साफ-सफाई अर चोखी व्यवस्था मांय श्रेष्ठ आवण वाळा पशु चिकित्सा संस्थानां ने जिला अर राज्य स्तर माथे प्रशस्ति पत्र दे र सम्मानित कर्यो गयो। आ जाणकारी देवता थकां महकमां रा शासन सचिव समित शर्मा बतायो की विश्व पशु कल्याण दिवस रे मौके माथे प्रत्येक जिला स्तर पर तीन-तीन अर राज्य स्तर माथे दस सबसू चोखो संस्थानां ने प्रशस्ति पत्र दे र सम्मानित कर्यो ग्यो है। ध्यानजोग है कि राज्य स्तर माथे पैली जगह पॉलीक्लिनिक सवाईमाधोपुर ने मिल्यो है जद की दूजी जगह चुरु रे मलासी पशु चिकित्सालय ने मिली है। डॉ शर्मा बतायो के स्वच्छ अर व्यवस्थित संस्थान वठे काम करण वाळा अहलकारा अर कर्मचारियां री कार्य कुशलता, सकारात्मकता अर उत्पादकता बधाणे माथे भूमिका निभावे है।

000

प्रधानमंत्री नरेन्द्र मोदी रे तीजे कार्यकाल मांय पैले सौ दिनां मांय कर्या गया खास कामां रे बारे मांय जाणकारी देवण खातिर आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी जा री है। आज म्हे आपने डाक महकमां कानी सूं इण रे चालता करीजी पहल रे बारे मांय बता रह्या हा।

.....

दौसा जिला रा लालसोट मांय आज बेकाबू डम्पर बस स्टैण्ड माथे खड्या कोई 15 जणा ने टक्कर मार दी। इण हादसे मांय पांच जणा री मौके माथे मौत व्हेग्यी। जद की हादसा मांय दस जणा घायल व्हे गया। घायलां मांय सूं चार ने गंभीर अवस्था मांय लालसोट सूं जयपुर रैफर कर्यो गयो है, अठिने हादसे रे पाछे लोगां नाराजगी जताता व्ह्या प्रदर्शन भी कर्यो। सरुआती जाणकारी रे मुजब डम्पर रा ब्रेक फेल होणे सूं केई मोटरसाईकिल अर राहगीर बिणी चपेट मांय आ गया। इण हादसे ने लेर राज्यपाल हरिभाऊ बागडे गहरी संवेदना जतायी है।

000

शारदीय नवरात्र रे चौथा दिन आज माँ दुर्गा रा कुष्मांडा स्वरूप री पूजा अर्चना करी जा री है। इण मौके माथे प्रधानमंत्री नरेन्द्र मोदी सोशल मीडिया पोस्ट माथे मां दुर्गा ने नमन करता व्ह्या आप रे संदेश मांय कह्यो की माता री कृपा सूं सगळा रो जीवन आयुष्मान होवे। मुख्यमंत्री भजनलाल शर्मा इण मौके माथे शुभकामनावां देता थकां सोशल मीडिया पोस्ट मांय लिख्यो की मां जगदम्बा री असीम अनुकम्पा सूं प्रदेशवासियां रो जीवन सुख, समृद्धि अर खुशहाली सूं भर्यो रहवे। नवरात्र रे चालता प्रदेशभर रा मिंदरा, शक्ति पीठां अर घरां मांय खास अनुष्ठान हो रह्या है। और ब्यौरा हमारे संवाददाता से—

.....

सीकर जिले मांय थापित खाटू श्याम मन्दिर रा कपाट नौ अक्टूबर ने बंद रेवेला। ऐडा मांय सिरधालू मांय मिंदर मांय बाबा रा दर्शन नी कर पावेला। श्री श्याम मिंदर कमेटी इण बारा मांय सूचना जारी करी है। ध्यानजोग है कि खाटू श्याम जी मिंदर मांय खास पूजा रे कारणे म्हीने मांय एक बार ऐडी व्यवस्था करी जावे है। पंरपरा रे मुजब म्हीने मांय एक बार मिंदर मांय तिलक श्रिंगार अर खास पूजा व्हे है। जिण रे कारणे सिरधालूआं रे खातिर बाबा रा कपाट बंद राख्या जावे है।

000

प्रदेश मांय मॉनसूनी बिरखा रो दौर थमणे रे साथे ही घणखर ठौड़ां माथे दिन रे तापमान मांय बधोतरी देखी जा री है। लारला चौबीस घंटा रे चालता प्रदेश मांय सब सूं बत्ती 39 डिग्री सेल्सियस तापमान श्रीगंगानगर मांय दर्ज व्ह्यो। टोंक मांय आज व्ही हल्की बूदाबांदी सूं लोगां ने गर्मी सूं थोड़ी घणी राहत मिली। मौसम केन्द्र जयपुर रे मुजब काले राज्य मांय घणकर जगावां माथे मौसम सूखो रेहवण री आस है। बुधवार ने बीकानेर, जयपुर अर भरतपुर संभाग मांय कठी—कठी बिरखा होवण री आस है।

000

मुख्यमंत्री आवास माथे आज पैली बार जैन धर्म रा सामूहिक क्षमावाणी कार्यक्रम राख्यो गयो। जैन मुनियां रा सानिध्य मांय व्ह्या इण कार्यक्रम मांय मुख्यमंत्री भजनलाल शर्मा अर घड़ी तादात मांय जैन समाज रा प्रबुद्धजन भेळा व्ह्या। जैन मुनी मुख्यमंत्री ने आशीर्वाद दियो।

000

आज विश्व सेरेब्रल पाल्सी दिवस है। ओ दिन सेरेब्रल पाल्सी रा बारा मांय जागरुकता बढ़ाणे अर इण सूं पीड़ित लोगां रे प्रति सम्मान करणे रे लगस सूं मनायो जावे है। सेरेब्रल पाल्सी मस्तिष्क मांय नुकसान सूं पैदा होवण वाळी समस्या है। आ हानि प्रसव रे चालता या जन्म रे पाछे लगे-टके तीन बरस ताई हो सके है। इण मौके माथे आज देशभर मांय केई जागरुकता कार्यक्रम व्हे रह्या है।

000